



Aningaasaqarnermut Akileraartarnermullu Naalakkersuisoq

Ulloq: 30. juni 2025
J.nr.: 01.31.06/25-01131

**Aningaasaqarnermut Akileraartarnermullu Ataatsimiititaliap ataasinngornermi ulloq
30. juni 2025-mi aalajangiineranik Naalakkersuisunut ilisimatitsineq.**

**Nuummi erngup nukinganik nukissiorfiup allilerneqarnerani suliniutit ilaasa
aningaasalersorneqarnerat. Ataatsimiititaliap suliaa nr. 01.31.06/25-01131.**

”Naalakkersuisut inassutigaa,

- kontumi pingaarnermi 80.00.02. Inuiaqatigiit aningaasaqarneranut iluanaarutissanngorlugit aningaasaliissutit, suliniut nutaaq nr. 21.080 Nukissiornikkut attaveqaasersuutiniq nutarterineq, Nuuk, aningaasaliissutit 2025-mi 18,5 mio. koruuninik amerlineqassasut, aamma
- 2025-mut ilassutitut aningaasaliissutitut inatsisissatut siunnersuummi kontumut pingaarnermut 80.00.02. Inuiaqatigiit aningaasaqarneranut iluanaarutissanngorlugit aningaasaliissutit oqaasertaliussamik ilanng-ussisoqassasoq ilanngussaq 1 naapertorlugu.”

Aningaasaqarnermut Ataatsimiititaliap oqaaseqaatai apeqqutaalu

Ikinnerussuteqarluni oqaaseqaat

Assigiinngitsunik pissuteqarluta aningaasaqarniarnikkut akisussaassuseqanngitsumik qinnuteqaatip matuma suliarineqarnera akuersaarneqarsinnaanngitsutut Naleqqamit isumaqarfigivarput.

Siullermik innuttaasut ulluinnarni inuuniarsaripput, illuatungaani qinikkat aningaasat eqqaassutissatut suliniutitut atorusunnerugaat. Aningaasat nunarput tamakkerlugu aserfallatsaaliisimannginnermut aamma innaallagissap, erngup kiassarnerullu akikinnerusup qularnaarneqarnissaannut atorneqartariaqaralarput.

Aappaattut Naalakkersuisut nammineq naatsorsuinerisa, assuarnarluinnartumik inuiaqatigiit aningaasaqarniarnerannut sunniutissanik nalilersuinerit ukiunut 80-inut! sivitsorlugit, takutippaat piffissaq taamatut sivilisutigigaluarpuunniit tamanna inuiaqatigiit aningaasaqarniarnerat eqqarsaatigalugu amigartoorutaasussaasoq.

Inuiaqatigiit aningaasaqarniarnerannut sunniutissanik naatsorsuinerit sumut atussagatsigit malinnianngikkutsigit.

Peqatigitillugu Naalakkersuisut ataasiaratik erseqqissarpaat: "Naatsorsuutigisat qitiusut malussajassusiinik misissueqqissaartoqarpoq. Ataatsimut isigalugu malussajassutsimik misissueqqaarnerit takutippaat, naatsorsuutit inernerit naatsorsuutigisat ilaasa allanngornissaannut isumannaatsutut inissisimanngitsut." Minnerunngitsumillu: "Tamatuma kingunerisaanik siunissami uuliamik atuinnermut atatillugu aningaasartuutit pingaaruteqannginnerulissapput, taamaattumillu periarfissatut ilusiliaq tunngaviusoq iluanaarnarnerungaatsialertussaavoq."

Allatut oqaatigalugu suliniutit ingerlaqqinneqanngippata tamanna innuttaasut akikinnerusussaavoq, Maanna siunissamilu. Taamaattuminguna aamma naalakkersuinnermik suliallit kukkusunik aalajangiinissaat pinngitsoortinniarlugu nalunaarusiortitsisoqartarsimavoq, soorlu tamanna NIRAS-ip nalunaarusiaani 2025-imi februarimeersumi takutinneqartoq:

"Ingerlaavartumik nutarterisarnermi Kalaallit Nunaanni erngup nukinga pillugu sulianik misissueqqissaarnerup paasissutissanik nutaanerpaanik eqqornerpaanillu tunngaveqarnissaata qulakkeerneqarnissaa siunertarineqarpoq. Tassani sanaartornermut missingiutit, nukissiornermut naatsorsukkat aamma ikummatissat akiinut, aningaasaliinnermut aningaasartuutitut avatangiisinullu tunngasunut naatsorsuutit allanngorneri ilaatinneqarput, taamaaliornikkut suliasat pillugit aalajangiinissamut tunngavissat sapinngisamik isumannaannissaat tutsuiginartuunissaallu qulakkeerniarneqarluni."

Pingajuattut Naalakkersuisut suliniummik Inatsisartunut qinnuteqarput, tamatumunnga atatillugu aningaasartuutit tamaasa ilanngunnagit. Soorlu Naalakkersuisut qinnuteqaamminni allattut: "Saniatigut innaallagiamut aqquusiinissaq pillugu politikikkut isummertoqanngilaq", taamaakkaluartorli Naalakkersuisut Inatsisartunik ukiumut 18,5 mio. kr.-inik katillugillu 231,8 mio. kr.-inik pituttuiniarput sillimmatitut innaallagissap aqquutissaanik pilersitsinissamut.

Tamatumani Naalakkersuisut namminnek inerniliussaata ilanngunneqarnissaa pingaaruteqarpoq:

"Nuummi suliasamut tunngaviusut kisiisa qimerlooraanni suli inuiaqatigiit aningaasaqarnerat eqqarsaatigalugu akilersinnaapput, CO2-mut aningaasartuutissat ilanngullugit ilanngunnagillu, immikkut pilersuinissamut aqquutissaq (pisariaqavinngitsoq) sanaartornermut ilanngunneqassanngippat."

Taamaalilluni Naalakkersusiut ima oqaaseqarnerat: "Nuup, Qasigiannugit Aasiaallu eqqaanni erngup nukinganik nukissiorfiliornerit inuiaqatigiit aningaasaqarniarnerat ataatsimut isigalugu akilersinnaapput" eqqunngilaq.

Naleqqamiit eqqaasitsissutigissavarput inuiaqatigiit aningaasaqarniarnerannut kingunerisassanik nalilersuineq periaasiummat annertoq, inuiaqatigiit tamarmiusut eqqarsaatigalugit suliniuti aningaasaqarniarnikkut kingunerisassaasa tamarmiusut nalilersorneqarnissaannut atorneqartartoq. Taamatut nalilersuinnerup siunertarisarpaa


inuiaqatigiit pisuussutaasa pissarsiviunerpaamik atorneqarnissaasa inuiaqatigiinnullu iluaqutissartaasa aningaasartuutinit annertunerunissaat qularnaarniarlugu. Tamanna immikkut pingaaruteqarpoq aalajangiiniartarnerni pisortat aningaasaataat pineqartillugit. Pisumi matumani inuiaqatigiit pisuussutaasa pissarsiviunngitsumik atorneqarnissaat Naalakkersuisut qinnutigaat, inuiaqatigiinnut ajoqutissartai iluaqutissartaanit malunnarnerullutik.

Kalaallit Nunaanni inuuniarneq akisunerulersissanngilarput, naalakkersuisoqatigiit maanna iliorniarnerrattut. Taamaattumik qinnuteqaat manna Naleqqap itigartippaa.

Aningaasaqarnermut Ataatsimiititaliap aalajangernera

Qulaani allassimasutut oqaaseqaateqarluni Aningaasaqarnermut Akileraartarnermullu Ataatsimiititaliami amerlanerussuteqartut Naalakkersuisut inassuteqaataat **akueraat**.

Inussiarnersumik inuulluaqqusillunga



Erik Jensen

Aningaasaqarnermut Akileraartarnermullu Ataatsimiititaliap siulittaasua